

BREVE CURICULUM DI OSCAR S. WYATT JR.

Man Of The Year 1998



Oscar Wyatt a nace na aña 1924, na Beaumont, Texas, cerca di Spindletop, lugar di e famoso descubrimiento cu a lanza Texas su industria di petroleo, di cual Oscar Wyatt ta un di e figuranan mas prominente.

Siendo un estudiante di high school na Navasota, Texas, Sr. Wyatt a bira un piloto di avion na edad di 16 aña. El a inscribi den e Universidad di Texas A&M na 1941, y e siguiente aña el a ingresa den e ehercito di su pais voluntariamente pa sirbi como un piloto di combate durante Segunda Guerra Mundial. El a obtene e decoracion di "distinguished service" den e Teatro pacifico di e mencionado guerra.

Despues di a presta servicio na su pais, el a regresa Texas A&M y a gradua cu honor, obteniendo e titulo di Bachelor of Science den Ingenieria Mecanico na 1949. E mes a financia un gran parti di su educacion universitario sembrando aroz riba 640 acre di tera cu el a rent den e area di Beaumont.

Despues di su graduacion, Oscar Wyatt a traha den e industria di perforacion den e region di Gulf Coast. Cu un gran cumulo di habilidad y determinacion, pero sin recursonan financiero, el a lanza su mies como un homber di petroleo independiente na 1950, prestando 800 dolar, pa cual el a duna como garantia su auto Ford 1949. E aña siguiente, el a forma su propio Compania Anonimo yamando e "Hardly Able Oil Company. Despues el a forma un sociedad cu ya ta Wymore Oil Company.

Na 1955, e sociedad a ser disolvi y, cu algun socio, Sr. Wyatt a forma Coastal States Gas Producing company, cual, hunto cu su otro companianan, lo bira The Coastal Corporation (NYSE: CGP). Cu asetnan consolida di casi 12 biyon di dolar, Coastal a bira un di e companianan di energia mas diversifica di Merca, y un di e corporacionnan mas grandi di mundo, alcanzando e ranking No. 158 di Fortune 500, y entre e 50 companianan industrial mas grandi di Merca. Sr. Wyatt semper tabata e accionista individual mas grandi di e compania, y tabata su unico Chairman of the Board te dia 15 di Juli 1997. E ta sigui sirbi den e Directiva di Coastal y ta actua tambe como e Chairman di e Comité Ehecutivo.

Ademas, Sr. Wyatt ta supervisa diferente negoshi particular, incluyendo ganaderianan grandi y industrianan agricola na Utah, Colorado, Oklahoma y Texas, y tin tambe propiedadnan considerable den e industria bancario.

Sr. Wyatt ta keda activo den materianan di politico publico. Como un autoridad reconoci riba e tereno di mercadonan global di petroleo, e ta asisti na mayoria di e reunionnan di e Organizacion di Paisnan Exportador di Petroleo (OPEP) como un observador independiente. Cu su esposa, Lynn, e ta sostene hopi actividadnan caritativo, educacional, medico y cultura. E ta miembro di e Board of Trustees di DeBakey Medical Foundation, un miembro di Board of Stewards of the Texas Aviation Hall of Fame, y ta tambe Consul General Honorario di Filipinas na Houston.

Oscar S. Wyatt Jr. Man of the Year 98



ORANJESTAD(AAN)Awe, DIARIO ta anuncia Man Of The Year pa aña 1989, cu ta Sr. Oscar S. Wyatt, Jr., pa tur e contribucionnan cu el a haci na Aruba, diversificando e economia di nos isla y dibuhando nos dilanti un futuro mas promisor. E apertura di Coastal, djey e ampliacion actual na balor di 250 milyon dolar, pa despues bin cu otro posible ampliacion mas, ta merito suficiente di un persona cu a contribui realmente na e bienestar di Aruba. Pa tur esaki, y e obranan social cu Coastal ta ehecutando y lo bay ehecuta den futuro inmediato, DIARIO ta nombra Sr. Oscar Wyatt, Jr. como Man Of The Year 1998.

Pa un breve curriculum, fabor lesa pagina 3.